



**Senin, 4 April 2022**  
**Ogen: Esekiel 33:23-29**



Ingan Si Terulang



**T**uhu, lit sura-sura Tuhan si ateNa ipesehNa man bangsa Israel si tading denga i Jerusalem. La kerina bangsa e itawin ku Babel. Kepeken, aminna piga-piga si enggo itawin ku Babel, labo erbahansa si tading i Jerusalem e jera. Tetap denga lagu langkahna erbahan curna gelar Tuhan. Aturen agama la idalankenna, ipanna daging si je denga darehna, isembahna denga berhala, munuh, ernalem man pedangna, lagu langkahna erbahan ciga ate, erlua-lua e semal ilakokenna. tambah si e nina taneh Jerusalem e sekerajanggenna sabap enggo nai iendesken e man nini tudungna Abraham. Pengakapna adi enggo iendesken man Abraham, e enggo jadi warisen she rasa lalap. Lupa ia ise si mere taneh e man Abraham.

La lit teridah perbahanen si jera i bas bangsa e, enggo pe iruntuhkan kota e lalap mekeng, akapna lalap lit denga gegehna. Erkiteken si e, isuruh Tuhan mulihi Esekiel erbelas man kalak enda. Tuhan ngerana maka labo banci taneh e jadi sikerajangen Israel rasa lalap. Taneh e Tuhan empuna, labo Abraham. Iberekenna taneh e man Abraham labo jadi hak milik, tapi hak guna tading ras nggeluh i je. Erkiteken kegeluhen Israel la encidahken kepatuhen man Tuhan, janah sapih-sapai ia pe la lit kehamaten dengen kekelengen, ciga kal ate Tuhan. E maka iturikenna man Esekiel maka bangsa e lanai banci tading i Jerusalem. Kerian arus mate, si tading i daraten kuta mate ipan rubia-rubia kerangen, si cebuni I datas deleng ras gua-gua mate ibahan pinakit. Ipediat Tuhan taneh Jerusalem terulang, ise pe langasup mentas dengen tading i je. Ale erbage cara ibahan Tuhan nuduhkan kuasaNa man banta, IA nge si mada taneh ras kegeluhen doni enda. Labo banci bagi ate-ateta, aminna pe genduari kita tading i je. Iukum Dibata kepe kalak si la patuh man aturenNa.

*Tuduhkan kepatuhen man Dibata alu ngikutken sura-suraNa.*